

AJONI, FIZU!

A los intendes, fizu!...Sun son passos
de sos voluntarosos chitulanos
chi cand''essit su sole, han già in manos
fadigas de ispargher e suore.
Cant'isperantza, fizu, e cant'amore
bi lassan d-onzi die in milli zassos.

Lu faghen pro su pane!, e su ch'a tie
hamus dadu pro t''ider "bellu e mannu",
fin sas fadigas de annu chin annu
ca babbu tou hat tribuladu gai.
E, tzertamente, istadu no' est mai,
cando fit sanu, in lettu a mesu die.

Com'est biadu!...Sa matessi terra
ch'eris l'hat dadu su pane 'esa vida,
l'est faghende de nidu, s'est unida
a su pasare sou, a sa carena
chi fit ancòra 'e voluntades prena
cand'hat finidu totu: gosu e gherra.

Isse fit totu!: su trivallu sou
fit pro nois respiru e dignidade,
fit sa chi gramaian povertade
e ch'invetzes, pro nois, fit ricchesa.
...commo toccat a tie, ajoni, pesa!
ch'onoras su ch'hat fattu babbu tou.

Mai las timas sas giustas fadigas
e chentz''e issas non nde chirches benes.
Comente est fadigadu su chi tenes
gai fadighes pro su chi no' hasa,
e has a bider chi des haer, crasa,
unu mare de paghe e de ispigas.

Sos dirittos benin a pustis
de sos doveres;

IGNAZIO PORCHEDDU
POSADA